

山雲樓文鈔

郭柏蔭題籤

伯瀛

配雲樓文鈔卷九

閩縣劉存仁炯甫篆

諭回民 乙丑四月

諭回民知悉閱稟情詞懇切真心投誠具見悔罪苦衷殊堪
憫惻我國家深仁厚澤二百餘年爾回民自祖父以來並
生並育於覆載之間或世受簪纓或身膺仕版或嘯歌學
校或効力疆場罔不涵泳聖涯共享昇平之樂查甘肅
漢民與回民相安已久本無讎隙日前克復固原甘回張保
隆尙知執挺助陣保護漢民經雷提督入奏荷蒙嘉
獎予以自新可見回民自可遷善去年陝回馬三元投誠之

後被回逆任老五賊害曾經多大帥入奏蒙

恩賜卹有

功必賞我朝之待爾回民不可謂不厚矣乃自陝西奸回煽虐倡亂以來爾等良回或被誘惑或受脅從或誤信洗回之讒言或構禍於漢團之讎殺膠結蔓延固結而不可解罪在渠魁於爾等良回無與不過一朝之忿置性命身家於不問殊不知螳臂當車自取滅亡之道試觀髮捻諸逆蹂躪江南北將十年今皆身膏斧鑕誅戮無遺爾回民自揣智謀才力能及髮捻之萬一否猶且執迷不悟自外生成其悍可誅其愚可憫本三月杪一役固原僞頭目馬生顏被戮於平羅孫義保伏誅於花池此皆陝西悍賊惡貫滿盈藁衢梟示

作惡降殃已有明驗本將軍奉

命西征體

天地好生

之德布

朝廷寬大之恩敬謹謄黃宣布

上諭只分

良莠不分漢回寬其既往予以更生不憚告諭再三爾回民亦習聞而親見之矣本將軍入甘以後滾營而進以薄城下爾等但知負隅抗拒不敢臨陣交鋒試問四面合圍大梟獍而小鯨鯢豈能遁九地九天之外亦不忍不教而誅我國家宏開湯網與爾回民共戴堯天乃猶首鼠兩端遲疑不決誠如來稟劫數使然以致生靈塗炭嗟夫肖翹鱗介仁人尙不忍加戕豈心知血氣之倫視蠢蠢竟同草菅亦握重兵者所不樂也今幸爾等天良不昧懇稟投誠是亦天心悔禍

之一機在昔回紇助唐有功社稷爾回民何嘗不可立功郭
令公單騎見虜棄械歸誠爾回民何嘗不可從善來稟引孟
獲攻心之說並慮及漢民耕種不時立填溝壑等語可見爾
等原有深明順逆之人故再往復曉諭爲爾等告蓋行軍之
道有三曰恩曰威曰信何謂恩爾等良回如果真心歸順先
遣明白曉事頭目數人前來行轅妥議章程漢民如何釋怨
回民如何安插再限五日內獻出城池繳出馬匹器械甯郡
收復決不誅戮一人定當奏明

皇上貫其不赦之罪

咸與自新同遊化字所謂恩也何謂威爾等甯郡一隅卽倚
靈州爲犄角財力已窮搶掠已盡其餘各路固原蓮花城敗

匪均是釜底游魂鼠竄狼奔自顧不暇豈能當天下之全力
現蠢爾跳梁

聖明赫怒屢奉

上諭發天下之

重兵撥天下之協餉掃穴擒渠盡勦無赦不日楊總督鮑提
臺統率勁旅尅期可到與本將軍會勦天戈所指玉石俱
焚若再遲延噬臍無及所謂威也何謂信本將軍言出法隨
信賞必罰生平不肯欺人念爾等均朝廷赤子豈忍駢首
盡誅仰體我

皇上一視同仁不分畛域必不逆諸夷

狄之例今爾等自拔來歸本將軍妥爲安插據情入奏決
不食言所謂信也且閱爾四人前稟畏罪匿名原是良回之
謹愿者懼與匪類爲讎且來稟所稱或爲親而屈或爲宗祧

而計猜疑退縮不敢主張均是實在至情試問陝西煽亂經
多大帥節節掃蕩其敗挫餘孽竄越甘省其墳墓田廬兄弟
妻子宗族親戚俱已蕩爲冷煙化爲灰燼言之痛心聞者酸
鼻當年之桀驁跋扈者至今安在爾等果爲宗祧父母妻子
計前車可鑒何甘自受其愚此本將軍救民水火之苦心也
第二稟赫馬兩頭目聯名情詞愈哀切可憫欲求諭降河東
馬化澂等亦是不能主張意見但馬化澂在靈州爾等在甯
夏兩不相涉何必觀望甯郡投誠之後不特河東諸回民知
有可生之路卽口外哈密羣不逞之徒得明理者廣爲勸諭
自拔來歸永息戈兵同安耕鑿免彌天之大罪爲 盛世之

良民是爾等洗心革面重見天日之時也可不念哉况軍務
一日不清官兵一日不撤官兵愈增愈多糧餉各省運濟回
匪愈勦愈少糧食日久愈空今野無青草田畝荒蕪爾等從
前搶掠餘積糧食必定告匱果何恃而不恐此理甚明不待
智者而決矣諭到速卽三思須知本將軍仰承 天命
於聲罪致討之中仍寓除莠安良之意及早回頭毋貽後悔
凜遵切諭

此稿迅筆疾成不厭詳盡後意見不合改用胥吏公牘百
餘字姑留之以紀實 自記

代穆春巖大帥復陝撫劉霞仙中丞書

接誦環雲具承肫注前餉銀軍伙等件陸續解到種費盛心
祇以敵軍待餉孔殷是以疊次專弁持函冒懇計經達到營
中既患無銀卽餉銀既到而轉運又在數百里之外日日懸
釜待歟不勝焦灼我軍久逼甯郡城下城大而堅該逆分擾
平羅三月杪弟督隊親勦斬獲甚夥近又竄入中衛被圍甚
急正欲裹糧越草地赴援而五月念一日慶石樵因病出缺
賊又乘隙圍困滿城弟於閏五月初四日會同都帥出隊連
日大獲勝仗攻破賊圩十餘座敵部將士爭先用命東北賊
圩已行全燬竭力攻漢城南門以期聯絡該賊勢已窮蹙奈

糧食不繼當此溽暑枵腹荷戈難期踴躍苦喚奈何幸停炊三日嚴催各糧局陸續解到稍資支放而都帥部伍袖手站隊又非弟之所能調遣種種棘手摯愛有素用敢密陳非言語所能形容也事權不一迄無成功誠屬不知所措幸接曹蓋臣五月念七日來函知大兵一到不戰而潰中衛解圍距金積堡老巢一百三十里之遙俟辦足糧食月杪直搗金積堡老巢逕趨靈州似此夾擊賊首尾不及兼顧從此一鼓得手昨已馳覆曹軍門矣靈州旣平此地不難得手承詢投誠之說四月初該逆兩稟到敝部黃軍門金山處求爲轉稟語甚恭順議獻出城池器械馬匹銀米未有成數都帥以回情

反覆狡詐難測堅不受降與弟會詞入 奏俞允矣此議遂
寢該逆亦分竄四路其納餉三十萬戰馬三千匹乃謠傳無
根之言承 示受降如受敵此事原自不易不勝欽服楊制
府西來事權歸一於西事大有裨益忽聞奉 廷旨飭赴

直隸以顧畿疆門戶自是先其所急惟全甘糜爛頭緒紛歧
非總制帥干居中調度難期奏效弟本幫辦客官諸事稟承
都帥全省稟報不到難以周知而體察情形杞憂殊切陶軍
門潰勇六七十竄擾西安一敗不可收拾威名大挫安定危
急逼近省垣而蘭垣又無知兵之將調遣徒見張皇肅州嘉
峪關相繼失守關外實不可問計續 派陝甘督未知何

人尙須遲延時日幸雷曹兩軍威名尙壯可望合勦得手耳
至另示以貴體操勞擬於秋初引退現在 聖主冲齡

正賴羣賢夾輔四海正拭目以望 中興加以僧邱殉難

直疆震動以老兄公忠體 國攬轡澄清正臣子臥薪嘗膽

之秋豈忍言東山高臥卽引嫌而論自古君子與小人爭則
小人必勝何者君子難進而易退也天道三微而成著姤一
陰始生復一陽始長聖人每扶陽而抑陰自復而臨而泰馴
至拔茅彙征則陽道盛矣况 聖明在上早已牛渚燃

犀勿庸介意豈等五斗卑官無關輕重不妨初衣決計哉仍
願整飭紀綱扶植善類則全陝之福也自來官殘則民窮民

窮則盜起甘省兆禍之源想非一日而轉移之術亦豈無方
否則武臣戮力而戰諸原文吏貪殘而敗諸室天下事覆轍
相尋大都可嘆隨筆縷述伏乞鑒裁弟白

末幅議論尤爲正大

松注

代穆春岳大帥復楊厚菴制府書 岳斌

前泐兩檄述辰下軍情計登鐵掌頃奉賜函肫注知前麾已抵西安從此滾營而進指日功成破竹

眷篤剖符雖古

方叔召虎蔑以加諸益信元老壯猶其智勇超出尋常萬萬也乃猶謙光下逮不棄葑菲愈見休休有容集思廣益令人欽佩已將戎機管見會商後彙復直夫大帥信中不贅抑弟更有說者弟隨征多帥有年從陝入甘竊謂甘獯與髮逆異髮逆志在占踞城池勁悍慄忽易聚易散若臨以重兵禽獮獸薙則急擊可以立破甘獯利在擄掠財穀生於斯長於斯醜類既繁人皆土著深根固蒂誅不勝誅始則漢回猜疑陰

蓄異志陝回從而煽之脅徇從而附之焚掠飽颺視兵威官
法爲兒戲涓涓不塞遂成江河戕官害民結成死黨城池遂
不得不占踞非先勦後撫不足以廓清邊境從前患知兵之
無人近日又患事權之不一甘省文懦武嬉久矣營務廢弛
吏治模稜倉庫空虛習尙貪鄙上下相蒙寢成積習猝遇變
故以不教之團練久疲之卒伍制方張之獠寇畏蕙張皇手
足無措又以兵餉兩竭極力彌縫不言勦而急於用撫養癰
滋蔓賊膽愈張跨郡連州遂塗炭生靈糜爛不可收拾今幸
重逢舊雨素仰英風老謀卓識極知仁兄爲第一流威望加
以師干總制造福西陲則凡熊羆之士莫不願歸節制赤心